

Na osnovu člana 12. stav (2) Zakona o kontroli cijena ("Službene novine Federacije BiH", br. 2/95, 70/08 i 39/24), federalni ministar trgovine donosi

UPUTSTVO
O NAČINU, SADRŽAJU I ROKOVIMA DOSTAVE
OBAVJEŠTENJA O PROMJENAMA CIJENA ZA
POJEDINE PROIZVODE U INFORMACIONI SISTEM
USPOREDI CIJENE

I. UVODNE ODREDBE

Član 1.

(Predmet)

- (1) Ovim uputstvom propisuju se način, sadržaj i rokovi u kojima privredni subjekti (trgovci) registrovani za obavljanje trgovine na malo, Federalnom ministarstvu trgovine (u daljem tekstu: Ministarstvo) dostavljaju podatke o cijenama pojedinih proizvoda, radi evidentiranja i praćenja u Informacionom sistemu Usporedi cijene (u daljem tekstu: IS).
- (2) Obaveza iz stava (1) ovog člana odnosi se na prodajne objekte na području Federacije Bosne i Hercegovine tipa nespjecijalizovanih samouslužnih prodavnica, površine prodajnog prostora većeg od 401 m², čiji asortiman čine prehrambeni i neprehrambeni proizvodi.

Član 2.

(Lista proizvoda)

- (1) Ministarstvo utvrđuje i objavljuje listu prehrambenih i neprehrambenih proizvoda svakodnevne potrošnje za koje se vrši evidencija cijena u IS.
- (2) Lista proizvoda iz stava (1) ovoga člana objavljuje se na službenoj internet stranici Ministarstva www.fmt.gov.ba i dostupna je za preuzimanje.
- (3) Privredni subjekti (trgovci) dužni su dostavljati podatke o cijenama za proizvode s liste iz stava (1) ovog člana.

II. REGISTROVANJE TRGOVACA U IS

Član 3.

(Obaveza registrovanja i dostavljanje dokumentacije)

- (1) Privredni subjekti (trgovci) iz člana 1. ovoga uputstva u svrhu registrovanja u IS su dužni dostaviti Ministarstvu popunjenu i ovjerenu Izjavu - "Obrazac UC", koja čini sastavni dio ovoga uputstva i sadrži osnovne podatke o sjedištu privrednog subjekta.
- (2) Pored obaveze iz stava (1) ovog člana, privredni subjekti (trgovci) su obavezni popuniti Excel obrazac s matičnim podacima o svim prodajnim objektima u svom sastavu i isti dostaviti Ministarstvu putem elektronske pošte.
- (3) Excel obrazac iz stava (2) ovog člana dostupan je za preuzimanje na službenoj web stranici Ministarstva (www.fmt.gov.ba).
- (4) Excel obrazac iz stava (2) ovog člana dostavlja se elektronskim putem na službenu adresu elektronske pošte Ministarstva: usporedicijene@fmt.gov.ba.
- (5) Privredni subjekat (trgovac) je obavezan imenovati kontakt osobu i zamjensku osobu za tehničku i operativnu komunikaciju s Ministarstvom, uz navođenje službene e-mail adrese i broja telefona u Excel obrascu iz stava (2) ovog člana.
- (6) Ministarstvo obrađuje podatke u skladu s propisima o zaštiti ličnih podataka.

III. NAČIN DOSTAVLJANJA PODATAKA U IS

Član 4.

(Način i rok dostavljanja podataka)

- (1) Dostavljanje podataka iz člana 2. ovog uputstva vrši se isključivo elektronskim putem, korištenjem standardizovanog aplikativnog programskog interfejsa (u daljem tekstu API - Application Programming Interface), na način koji omogućava automatski, tačan, potpun i pravovremen prenos podataka u centralni IS Ministarstva.
- (2) Podaci se dostavljaju u skladu s tehničkim specifikacijama, definisanim formatima i sigurnosnim zahtjevima propisanim API dokumentacijom, uz obavezu trgovca da osigura dostupnost, integritet, autentičnost i vjerodostojnost dostavljenih podataka.
- (3) Prenos podataka za prodajne objekte određene u članu 1. stav (2) ovog uputstva vrši se automatski, na dnevnoj osnovi u vremenskom intervalu od 00:00 do 04:00 sata, za prikaz u aplikaciji na taj dan.

Član 5.

(Autorizacija i pristup IS)

- (1) Pristup IS i razmjena podataka vrši se putem autorizovanog pristupa, pri čemu su privredni subjekti (trgovci) obavezni prilikom svakog pojedinačnog zahtjeva u zaglavlju zahtjeva dostaviti važeći autentifikacijski token, dodijeljen nakon provedenog postupka autorizacije.
- (2) Korisnik je odgovoran za čuvanje autentifikacijskog tokena, kao i za svaku zloupotrebu ili neovlaštenu upotrebu pristupnih podataka, te je dužan bez odlaganja zatražiti opoziv i izdavanje novog tokena u slučaju sumnje na kompromitaciju.

IV. STRUKTURA PODATAKA

Član 6.

(Sadržaj podataka)

- (1) Struktura podataka koju dostavljaju registrovani privredni subjekti (trgovci) sadrži identifikator trgovine (storeID) i listu proizvoda (Items).
- (2) Lista proizvoda iz stava (1) ovog člana obuhvata sljedeće vrste podataka:
 - a) kod promjene redovne cijene proizvoda:
 - barkod proizvoda (barcode),
 - nova cijena proizvoda (price), izražena u konvertibilnim markama (KM),
 - datum od kojeg nova cijena važi (validFrom).
 - b) kod promjene proizvoda na akciji:
 - barkod proizvoda (barcode),
 - akcijska cijena proizvoda (discountedPrice), izražena u konvertibilnim markama (KM),
 - datum početka trajanja akcije (discountedFromDate),
 - datum završetka trajanja akcije (discountedToDate).
 - c) kod akcijske prodaje:
 - barkod proizvoda (barcode),
 - novi datum završetka akcije (discountedToDate), koji ne može biti raniji od dana dostavljanja podatka.
 - d) kod izmjene trajanja akcije:
 - barkod proizvoda (barcode),
 - novi datum završetka akcije (discountedToDate), koji ne može biti raniji od dana dostavljanja podatka.
- (3) Cijene se dostavljaju u valuti KM s uključenim porezom na dodanu vrijednost u skladu sa važećim zakonskim propisima kojim se uređuje način formiranja i isticanja cijena u prometu na malo u Federaciji Bosne i Hercegovine.

- (4) Cijene se dostavljaju automatski svakim danom, u skladu sa članom 4. stav (3) ovog uputstva, bez obzira da li je došlo do promjene cijene u odnosu na prethodni dan.
- (5) U slučaju kada pojedini proizvod nije dostupan na zalihi (privremeno nije na stanju), privredni subjekat nije dužan dostavljati podatke o tom proizvodu za predmetni dan, već se takav proizvod izostavlja iz dnevnog zahtjeva i neće biti prikazan u mobilnoj aplikaciji.
- 6) Privredni subjekat (trgovac) je obavezan nakon što proizvod ponovno postane dostupan na zalihi, isti uvrstiti u prvi sljedeći dnevni zahtjev.

Član 7.

(Tehničke poteškoće i evidentiranje nedostataka)

- (1) Ako privredni subjekti (trgovci) ne dostave svoje podatke u skladu sa članom 4. ovog uputstva, smatra se da propisana obaveza nije ispunjena, a prikaz polja s podacima tog trgovca biće označena sivom bojom.
- (2) Ako privredni subjekti (trgovci) usljed tehničkih poteškoća nisu u mogućnosti izvršiti prenos podataka u vremenskom intervalu određenom članom 4. stav (3) ovog uputstva, dužni su bez odlaganja, a najkasnije u roku od 24 sata od isteka propisanog roka, o tome obavijestiti Ministarstvo elektronskim putem, na službenu adresu elektronske pošte Ministarstva: usporedicijene@fmt.gov.ba, uz navođenje razloga i očekivanog roka otklanjanja poteškoća.
- (3) U slučaju da podaci nisu uspješno dostavljeni u cjelini, odnosno nedostaju podaci za pojedine proizvode, isti će u aplikaciji biti označeni sivom bojom uz napomenu da podaci nisu ažurirani u propisanom roku.

Član 8.

(Zahtjev za dodavanje novog proizvoda)

- (1) Privredni subjekti (trgovci) iz člana 1. ovog uputstva mogu Ministarstvu podnijeti zahtjev za dodavanje novog proizvoda koji pripada listi proizvoda iz člana 2. ovog uputstva.
- (2) Zahtjev za dodavanje novog proizvoda iz stava (1) ovog člana podnosi se isključivo putem API-a, kroz strukturirani elektronski zahtjev (Zahtjev - prijedlog za uvrštavanje proizvoda).
- (3) Zahtjev za dodavanje novog proizvoda sadrži sljedeće obavezne podatke:
 - a) barkod proizvoda;
 - b) naziv proizvoda;
 - c) brend, odnosno robnu marku;
- (4) Zahtjev za dodavanje novog proizvoda sadrži i druge dodatne podatke informativnog karaktera:
 - a) oznaku da je li proizvod domaćeg porijekla (da/ne);

- b) oznaku da je li proizvod bez glutena (da/ne), pri čemu se ova oznaka može dodijeliti isključivo proizvodima koji tu informaciju imaju jasno navedenu na službenoj deklaraciji proizvođača;
 - c) naziv proizvođača;
 - d) jedinicu mjere;
 - e) neto količinu, odnosno težinu;
 - f) zemlju porijekla;
 - g) sliku.
- (6) Ministarstvo vrši provjeru dostavljenih podataka prije uvrštavanja proizvoda u IS.
 - (7) Ministarstvo će privredne subjekte (trgovce) o ishodu zahtjeva za dodavanje proizvoda, obavijestiti elektronskim putem.

V. PRELAZNE I ZAVRŠNE ODREDBE

Član 9.

(Uskladivanje poslovanja i obavještanje o promjenama)

- (1) Privredni subjekti (trgovci) dužni su uskladiti svoj rad i poslovanje te osigurati tehničke predulove za automatsku dostavu podataka u skladu sa ovim uputstvom, najkasnije u roku od 30 dana od dana stupanja na snagu ovog uputstva.
- (2) Ako dođe do promjene pravnog statusa privrednog subjekta, uključujući prestanak rada, promjenu vlasništva, prestanak rada prodajnog objekta, otvaranja novog prodajnog objekta, privredni subjekat (trgovac) je dužan o tome pisanim putem obavijestiti Ministarstvo najkasnije u roku od pet dana od dana nastanka promjene.

Član 10.

(Upravni i inspeksijski nadzor)

- (1) Upravni nadzor nad primjenom odredbi ovog uputstva vrši Ministarstvo.
- (2) Inspeksijski nadzor nad provođenjem ovog uputstva vrše federalni tržišni, turističko-ugostiteljski inspektori i kantonalni, gradski i općinski tržišni inspektori, svaki u okviru svoje nadležnosti i u skladu s ovlaštenjima propisanim zakonom i propisima kojim se uređuje inspeksijski nadzor.

Član 11.

(Stupanje na snagu)

Ovo uputstvo stupa na snagu narednog dana od dana objavljivanja u "Službenim novinama Federacije BiH".

Broj 01-02-384/26
08. aprila 2026. godine
Mostar

Ministar
Amir Hasičević, s. r.

„Образак УС“

(назив привредног субјекта)_____
(сједиште – адреса, мјесто, опћина)_____
(идентификациони број)**ИЗЈАВА**

Ја, _____, у својству одговорне особе привредног субјекта наведеног у заглављу ове изјаве, под пуном материјалном, моралном и кривичном одговорношћу, дајем слjedeћу:

Изјаву да су Федералном министарству трговине достављени тачни и потпуни матични подаци о свим продајним објектима који послују у саставу наведеног привредног субјекта.

Изјављујем да је привредни субјекат сагласан с транспарентним и јавним приказивањем цијена производа у оквиру трговачког ланца, за потребе реализације пројекта „Успоређи цијене“, у складу с важећим прописима.

Потврђујем да сви продајни објекти привредног субјекта испуњавају опће услове прописане у погледу минималне техничке опремљености пословног простора за обављање трговачке дјелатности, у складу с одредбама Закона о унутрашњој трговини („Службене новине Федерације БиХ“, број: 87/24), као и посебне услове прописане Упутством о начину, садржају и роковима доставе обавјештења о промјенама цијена за поједине производе у Информациони систем „Успоређи цијене“ у Федерацији БиХ и то:

- да ће се у Информациони систем „Успоређи цијене“ уредно и благовремено достављати свака промјена цијена производа обухваћених пројектом;
- да ће се подаци о промјенама цијена достављати у роковима и за период дефинисан чланом 4. став (3) Упутства о начину, садржају и роковима доставе обавјештења о промјенама цијена за поједине производе у Информациони систем „Успоређи цијене“ у Федерацији БиХ;
- да структура пренесених података за сваки појединачни производ у cjелини садржи све прописане елементе, у складу са чланом 6. наведеног Упутства.

Изјављујем да сам упознат/а са садржајем ове изјаве, да је иста дата добровољно, те да сам у потпуности свјестан/на правних послједица давања нетачних или непотпуних података, укључујући одговорност прописану чл. 14. и 17. Закона о контроли цијена („Службене новине Федерације БиХ“, бр. 2/95, 70/08 и 39/24).

Мјесто: _____

Потпис одговорне особе: _____

Датум: _____

Име и презиме: _____

М.П _____

Функција: _____